

四庫全書

集部

欽定四庫全書

宋百家詩存卷三十六

嘉善曹庭棟編

梅屋集

許棐字忱父海鹽人嘉熙中隱居秦溪種梅數十樹
構屋讀書自號梅屋慕香山東坡畫二像懸室中事
之嘗曰四壁天地萬卷春風庾嶺香孤山玉潔而可
以忘死著有獻醜集樵譚其詩清俊閑遠尤長於絕

句原本分梅屋四藁茲合為梅屋集

夜泊長河

黃帽貪程夜泊遲
市樓燈火歇多時
滿懷風月無分付
卻借漁翁短笛吹

訪潘叔明

一室寬於養鶴籠
荻簾疎透雪花風
怪來几案無寒色
春在題詩卷子中

明妃曲

漢宮睂嫵息邊塵功壓貔貅百萬人好把香閨舊脂粉
艷裝顏色上麒麟

醉起

午醉醺醺到日晡起呼茶盃炷熏爐隔窗幾點敲花雨
子細聽時卻又無

帕子

萬縷縱橫如妾恨一方輕薄似郎恩多時不繫纖腰舞
卻對花前拭淚痕

晚泊臨平

晚卸風帆泊市橋
稅亭民屋總蕭條
秦封不到河邊柳
送去迎來枉折腰

元夕後湖上作

自從樓閣罷燒燈
未有今朝一日晴
煖坼葑邊冰翼破
寒畱山頂雪痕輕
驕驄已印尋芳蹟
小妓新翻鬻唱聲
每箇旗亭商一醉
也應排日到清明

沈子壽郊居

屋外猶餘地百弓經鉏知費幾年功栽蔬少似於陵仲
種菊多於靖節翁偃屋溪山詩卷裏破除風月酒杯中
近來又喜禪機透一顧叢林萬衲空

贈葉靖逸

借我城居一丈寬五車書向腹中安聲華馥似當風桂
氣味清於著露蘭朝士時將餘俸贈鋪家傳得近詩刊
回看舊隱西湖上誰伴沙鷗度歲寒

鄭介道見訪

步頭楊柳種多年今日方維勝客船埽石共看山色坐
枕書同聽雨聲眠溪羹旋煮蓴絲滑野飯新炊芡玉圓
不管歸心忙似箭彊畱吟過菊花天

贈龔彥質

慈湖分與半窗燈照得襟懷徹底明蒲坐夜閒貓占臥
筍輿春暖鶴隨行爐香欲盡經猶誦硯墨才濃句已成
歲晚弟兄俱白首一樓風雨話更深

趙叔魯

天上除書絡繹飛謫仙何事得來遲
旅懷寬似居家日
學力高於未第時
山帶晴霏橫畫軸
水流清響入琴絲
世間多少王孫貴
無我寒泉一句詩

秋江漁父

小舟輕似一鷗飛
戀月隨風慣不歸
困臥蘆花淡雪裏
夜寒添蓋舊蓑衣

山間

趁得山間筍蕨春
借廚烹煮自炊薪
倩誰分我杯羹去

寄與中朝食肉人

木山父書院

占得文房一丈彊地幽雖夏亦清涼
瓶花誤倒水侵案書葉亂掀風滿牀
薜長密藤遮半壁桐分疎影出低牆
客來莫道無祇待只啜茶甌卻味長

贈畫魚沈秀才

寫字搗文不療飢生涯換得頗新奇
錦心暗織臨淵網蓬鬢潛縈釣雨絲
落筆易於投餌處得錢多似出罾時

漁翁枉占煙波闊不及君家小硯池

贈北磻

天下名山行腳遍依然形影瘦伶俜支吾寒暑袈裟耐
變幻煙霞筆硯靈對客敬如堂上佛讀書通似藏中經
石頭路滑終難到不是詩禪莫扣局

雪曉

臘雪連宵接曉飛錦衾公子未曾知起來攜杖敲梅樹
扶得輕盈壓損枝

閨怨

離愁一點濃如黛，彊把金篦掃不開。
新月幾番呈巧樣，薄情夫婿未歸來。

小院東風去住中，春愁原不隔簾櫳。
自家顏色凋零盡，卻對花枝惜墮紅。

枯荷

萬柄綠荷衰颯盡，雨中無可蓋眠鷗。
當時乍疊青錢滿，肯信池塘有暮秋。

春晚

推過詩編把酒斟
挽春幾句讓鶯吟
門前卻喜無人埽
積得殘花一寸深

贈臨上人

遶湖山疊翠師住最高層
野偈書林葉茶鐺煮澗冰
松筠為道友日月是禪燈
儻許分峯隱甘為有髮僧

客路

客路久驅馳
秋深兩鬢知
田家投夜宿
漁竈寄晨炊
契

分燈前影生涯索裏詩遙憐故園菊荒草沒霜枝

題倦庵

自扁庵為倦斯名恐未朕醉巾頻漉破游屐幾磨穿新
種竹都活舊栽花更妍門前春水漲催發孝廉船

贈元松軒

白髮蕭蕭客帝都故園閒卻種瓜鉏平時不信為儒誤
今日方知涉世疎煙浦未尋歸去艇雪窗猶讀借來書
詩名壓盡江湖客要在唐人向上居

題吳叔清郊居

哦松未了賦歸興
旋買田園結草廬
數畝竹陰惟欠鶴
半池山影不妨魚
舉杯多是沽來酒
插架無非讀過書
我已倦為都下客
願君分與把茅居

書郭子度壁

禁苑精廬是切鄰
衣巾雖舊不霑塵
鐘魚聲裏吟連曉
花柳香中醉過春
和土重泥燒藥竈
買絲親接釣魚綸
遶湖十萬人家住
如此清閒有幾人

鴈字

點畫分明印碧空迴鸞返鵲勢差同月邊映得銀鉤體
雪裏摹成玉筍功斷續似經秦火後悲涼如在楚詞中
愁人筆硯俱荒廢倩寫相思寄便風

宮詞二首

臥聽羊車輓夜雷知從誰處燕酣回蟾光也解君王意
隔箇簾櫳不入來

同入宮來幾許人因何遣妾護長門雲鬢半挽香腮瘦

卻愛菱花鏡子昏

古墓

石人猶自立蒿萊
拂讀殘碑字字哀
鄰冢已澆寒食酒
野風分送紙錢來

憶鄭元甫

別後黃花兩度殘
天涯彼此寄書難
幾行鴈字斜陽裏
聊當平安一紙看

傷春曲

日日望郎郎未歸玉肌寬盡縷金衣春心撩亂彊拘束
碎翦紅綃補舊枝紅綃才向枝頭住殘花又逐東風去
願花飛入笑筵中莫入愁人斷腸處愁人見花人自羞
花見愁人花亦愁飛花有盡愁無盡柳外一聲黃栗留

四時宮詞

因見落花心覺悟薄羅襟上淚痕乾容顏縱似花枝好
能得君王幾日看

碧玉涼梳落枕邊嬾梳雙鬢學新蟬恩情不及班姬扇

縱是炎天亦棄捐

涼夜誰同玉簟眠
湘波冷浸一枝蓮
君王不及中秋月
處處分身處處圓

雪壓長門消未盡
夜衾堆盡舊宮羅
鴛鴦瓦下垂冰筍
未抵思君玉筍多

郭評事

廷評滿腹貯陽春
筆下從來活幾人
廳小似分幽寺住
俸輕如在舊山貧
堆書教子猶疑少
倒屣迎賓不厭頻

欲效林宗巾角墊自嫌雙鬢有紅塵

瑛上人

十二三時便出家何曾頃刻離煙霞晨持數卷日方上
夜梵千聲月未斜洗鉢不經鷗浴水插瓶嫌采蝶殘花
儒冠誤我駸駸老何日蒲團共結跏

木芙蓉

芙蓉艷金谷秋色錦機中霜樹不知醜葉與花爭紅

破鏡詞

寶鏡一從分破後不堪磨拭照妝鈿倩誰攜上青雲去
補得今宵缺月圓

籠禽怨

千金新購入雕籠恨在嬌聲斷續中昨夜羈雌何處宿
落花殘月故巢空

張聲父

城中破屋妻兒住身向招提借小房壁上碑文皆古篆
案頭書冊半仙方月嫌碎竹遮窗暗風款飛花入座香

檢點未如僧相處只多髭鬚幾莖霜

泛剡

水闊無風似有風蘆花搖落艫聲中鷗無一點驚猜意
認作當時載雪翁

醉歸

半醉歸來臥不成月華霜采爛中庭茶鐺凍結香匳冷
只把梅花嗅得醒

湖上曲

新晴旋蠟遊春屐半溼香泥恰好行琢得小詞腔未穩
往來花下怯歌鶯

古硯送趙明府

一片端州古硯甄翁孫相授當良田寒梅磧下和冰洗
秋桂窗前滴露研學字不工空費紙吟詩雖苦未成編
贈君攜去薇花畔草詔閑時枕匣眠

戲題花

一片落花題一字轉成一句怨春詩縱橫貼在窗紗上

巧似迴文織錦時

畫眉曲

日印花枝欲滿窗
旋磨鸞鏡試新妝
恩情只似春宵短
睂帶空如柳葉長

湖邊

湖邊開到木芙蓉
攘盡荷花十里紅
紅蓼莫慚顏色淺
榮枯同是一秋風

讀南嶽新藁

春來遊未遍湖山已是風光一半殘細把劉郎詩讀後
驚花雖好不須看

花

牆頭新露一枝紅壓盡隋人萬采工香豔便棲雲鬢老
也勝飄泊向西風

別友

分付離觴莫滿斟酒淡還與恨同淡自憐不及春江燕
一路相隨伴好吟

不語僧

默坐蒲團若壑成客來惟聽小鐘鳴
卻嫌庭樹無禪力
時有風枝雨葉聲

數椽

數椽茅屋傍林塘幽似山僧獨住房
夜靜只憑猿守戶
晝閒時有鶴升堂
旋收落葉供茶爨
細擣枯花作印香
書冊滿牀詩滿索
別無生計亦何妨

送友人為僧

知心朋友雲霄裏三尺官綾取不難
禪衲乍披身愈瘦
儒冠新脫頂微寒
數編詩藁聊收起
一藏經文旋取看
惟我塵緣推不去
蕭蕭華髮伴漁竿

地爐

穴地為爐了一寒
肉屏氈帳任無緣
晨燒樹下霑霜葉
夜煮山頭瀉月泉
已借陽和歸故絮
更分光燄到殘編
百年貧富灰埃盡
荒冢累累夜燒邊

春雪

東風吹雨作花飛
寒勒芳程幾日遲
惟有庭前老梅樹
謝渠添補落殘枝

挽沈晏如

不信詩人一例窮
如公半世又成空
湖邊便欠尋梅友
籬下應無采菊翁
雪片堆平閒藥竈
雨聲敲碎舊漁篷
墓銘吟藁兒封寄
血淚斑斑浣紙紅

田間

田間久不到
草木半蕭疎
鷗占沈舟浴
蛩分破壁居
僕

溫攜到酒鄰送買殘蔬未說催租事黏窗且讀書

題野處

數畝家園枕碧波樹桑疎處補花窠簷低不礙儒冠入
橋矮才通釣艇過雲笛旋裁門外竹雨衣新織檻前莎
有時牛背看書罷一曲春風寧戚歌

孫祺卿新居

幾年銖累束修錢才向湖邊置一廬種竹庭深難得月
養魚池小易為泉山呈好畫當書案柳撒輕絲罩釣船

酒力半酣詩思倦矮牀相對白鷗眠

招高菊澗

時在縣齋

歸買秦溪屋一間才如都下僦樓寬門前養草如花賞
壁上黏碑當畫看自改舊時詩未穩獨斟新酒不成歡
髯仙只在淵明宅泥濘相邀寸步難

西真圖

翠水池邊宴蚤秋雲謠聲裏月西流醉歸不信乘鸞穩
卻擘蓮花作采舟

書北庵門

十度來敲九不磨
隔籬空見竹青青
不知池裏黃金鯽
聽講楞伽幾卷經

題趙子固春山上寺圖

望得招提見程猶
半日間馬嘶曾到
處僕指未行山風
遞松聲遠雲連草
色閒何如添箇我
坐石聽潺湲

湯婆子

一冬專寵道人房
不藉華清賜浴湯
皤腹卻無璋瓦分

矮身難稱綺羅妝
春生蝴蝶半牀夢
暖迫梅花一帳香
醉倚肉屏君莫羨
北邙多少黑頭郎

得閑亭

柳風雖小絲絲裊
花雨無多點點香
惟有吟毫閒未得
染紅濡綠一春忙

上趙蘭坡

身迫雲霄自不知
只如師友講論時
驅龍駕鳳陽冰字
翦月裁霞太白詩
雨院炷香熏畫卷
晴窗添水浸花枝

十年漫走江湖上咫尺蘭坡卻到遲

上嘉禾趙守

邦君一念只寬民真箇龔黃見後身和氣蒸爲千耒雨
暖雲裁作萬襦春座中長有清吟客庭下渾無健訟人
諸部盡能依此樣世間那有一家貧

挽周倅

真是分風月歸來無俸錢人皆嗤拙宦天又嗇長年舊
宅寒潮外新塋古樹邊一詩哀不盡簷雨對潛旻

題常宣仲草堂

隔市能幾步幽趣踰山林鑿池小如斗水淺魚自淡簷
任樹枝礙堦從草色侵不冒一鉏斲恐傷春風心朝出
貨仁義暮歸炊古今客來無可款石爐添水沈

劍言

朝潤郅支膏暮澤樓蘭血何如塵土中蝕爲無用鐵

題張俞仲竹屋

削成千蠹簡此屋是餘材長有清風至渾無俗客來猿

當吟案立鶴趁釣船迴添足歲寒計栽松復種梅

右梅屋初稿

樂府

妾心如鏡面一規秋水清郎心如鏡背磨殺不分明
郎心如紙鳶斷線隨風去願得上林枝爲妾縈畱住

題舒王遊半山圖

驢載新詩僕抱書松聲禽語當傳呼不知邂逅耕田者
問著青苗免役無

贈劉相士

滿鏡秋霜鬢影寒，此生堪笑復堪憐。
煩君只相看書眼，更對青燈得幾年。

宗之惠梅窠冰玉箋

百幅吳冰千蕊雪，對吟終日不成詩。
憶君同在孤山下，商畧春風弄筆時。

月澗惠硯滴

手不題詩已數年，硯輒相伴學於禪。
為君蘸溼元暉筆，

寫出江山雪後天

春思

嫁得蕭郎不戀家幾年流落在天涯
滿懷多少傷春事嫌殺沿門叫賣花

送趙丞

汝諤

竹梢風露松梢月未抵吟丞氣味清
笑問兩年何所得錦囊詩重俸囊輕

贈墨僧

老硯磨穿事不成萬言堆裏鬢星星願隨君去柯山下
收拾殘煙寫佛經

重陽乏酒

黃花吟笑竹籬邊笑我牀頭乏酒錢帶雨折來無用處
碎按金屑和茶煎

燭

長身夜占銀臺立燄燄光搖頂上珠貪向華堂照歌舞
不知灰得寸心無

贈錢相士

我貌君容一種寒鷺漂鷗泊廿來年我詩吟就無人買
君相公卿煞得錢

代術者言

不聞鼎沸烹夷叔那有雲臺畫四凶自與心君消息了
卻將甲乙問窮通

觀松岳畫卷

老屐相隨四十年慣看蒼翠聽潺湲今朝細玩松岳語

猶有吟行未到山

送趙蘭坡

弟判嘉興藹政聲
蘭坡兄又出專城
如將天上一蟾影
分作人間兩郡明
江冷雪隨帆幅去
路晴梅傍轎窗行
開藩便拜歸班詔
也與玉山添重名

題趙恕可山臺

繞宅無非罨畫山
吟臺更對好峯巒
巒錦囊低挂花梢上
玉子輕敲竹蔭間
小硯買來猿解捧
異書編就鶴同看

主人出赴功名會
澗水自清雲自閒

小蓑道人

滿面瘡痍癥胸中一泓雪
醒吟鶴背風醉臥鷗邊月
不賣嚇鬼符不試燒金訣
笑問舊蓑衣秋來添幾結

題丘竹坡新池

長安富貴海十客九倦還
君去不著意君歸無媿顏
舊園一二畝新居十數閒
花尋直樹種竹簡斜枝刪
詩句滿壁寫書編到處安
冬簷日曉暖夏戶風晝寒
不是時

令并只緣心地寬天下政多事不須牢閉關

右梅屋二稿

蘭花

竹底松根慣寂寥
閒隨桃李媚兒曹
高名壓盡離騷卷
不入離騷更自高

郭南湖見訪卻適有出一絕為謝

一篷風雨偶歸遲
見說君來扣我扉
童子困眠梅樹下
不曾放過鶴雙飛

錢謙齋新居

住破吳松江上屋杭州城外結新廬未尋陸羽烹茶具
先借淵明種菊鉏山入樓中成好句月來窗下伴殘書
御街車馬無行處誰肯抽身覓退居

寄照鏡潭

鏡潭炯炯秋無底著一纖雲也自多禪外當無些子事
如何猶有作詩魔

末利

荔枝香裏玲瓏雪來助長安一夏涼情味於人最濃處
夢回猶覺鬢邊香

寄題東洋

東洋占得江山勝安頓亭臺到處宜夜夜中秋明月影
朝朝寒食好花枝長箋短軸真行字舊刻新編倡和詩
只隔一潮飛不去悵懷惟有白鷗知

紅梅

不堪冷照黃昏月彊倚春風作杏妝雖得容顏暫時好

欠他肌骨舊來香

右梅屋三稿

餞梅

十日九風雪差見今春寒梅花瓣歸計一點心欲酸所
秉太孤潔有此末路難來年復相見一笑賀平安

築城曲

日將西杵聲急一聲聲自死腸出城高不持土累成半
是鋪填怨夫骨儒坑戰地骨更多十二金人隨鬼泣

馬塍種花翁

東塍白髮翁勤樸種花戶盆賣有根花價重無人顧西
塍年少郎荒嬉度朝暮盆賣無根花價廉爭奪去年少
傳語翁同業勿相妬賣假不賣真何獨是花樹

泥孩兒

牧瀆一塊泥裝璜恣華侈所恨肌體微金珠載不起雙
罩紅紗廚嬌立瓶花底少婦初嘗酸一玩一心喜潛乞
大士靈生子願如爾豈知貧家兒呱呱瘦於鬼棄臥橋

巷間誰或顧生死人賤不如泥三歎而已矣

染絲上春機

染絲上春機春濃絲色淺妾心隨梭飛郎心如軸轉
染絲上春機錦成貴無價不忍裁成衣怕翦鴛鴦破

長門怨

妾身如蓮根沈埋淤泥底雖有白玉姿無人爲拈洗
妾身如亂絲卷藏箱篋底願上鴛鴦機無人爲分理

秋風辭

颯颯秋風來一葉兩葉墜燕子動歸心薄情知也未
颯颯秋風來衣衾愁未整莫作閨中寒且作天涯冷

蝴蝶飛

蝴蝶飛蝴蝶飛紅邊迷了紫邊迷粉老香乾何處歸不
學蜜蜂做家計勤苦之中有甘味

三臺春曲

昨夜微風細雨今朝薄霧輕寒簷外一聲啼鳥報知花
柳平安

破硯

碌碌礧礧閒得此一雋石磨我三十年貌顰雙鬢白渠
亦苦我磨眼穿流淚墨老蟾在傍笑兩窮自相厄

對鏡詞

煙護杏顚寒日襯桃顚暖惟有鏡中花東風都不管

織錦詞

采絲愁緒雜春機伊軋聲中日又西織到花枝連理處
玉驄門外一驕嘶

春思

朝來一陣無情雨，敲得庭花半欲殘。
燕子不知人冷落，飛來簾底避春寒。

春雨

老來慵把種花鉏，片紫纖紅一任無。
不忍今春孤負雨，自收簷水浸菖蒲。

燕

處處亭臺宴好春，唱花歌柳調爭新。
梁間不用多言語，

回耳聽君有幾人

小盆花

小小盆中花春風隨分足花肥無賸紅葉瘦無久綠心
傾幾點香也飽遊蜂腹太盛必易衰荒煙鎖金谷

花願

未到無生無滅地聊為春風露紅紫不願隨風趁蝶飛
願就枝頭抱香死

諭柳

不須嬌逞舞腰肢
不須巧畫宮妝眉
只把千絲萬絲結
結住行人無別離

贈壽醫師寓雪峯

軒窗開處總湖光
誦罷難經納晚涼
雨濺荷香霑古衲
月移松影罩禪牀
然燈就取燒丹火
煮藥先畱淪茗湯
二豎三彭都見佛
人間無病亦無方

贈僧虛中

僧趁雪前到梅花
猶恨遲畧談殘歲
夢便和蚤春詩僵

鴈依船宿寒猿捧硯隨吟單未須捲重見是何時

右梅屋四稿

雪磯叢藁

樂雷發字聲遠號雪磯江右舂陵人登寶祐癸丑特
科廷對第一授館職時元兵犯邊作烏烏歌以諷當
路丙辰以病歸遂不復出雪磯叢藁五卷其友人朱
嗣賢何堯卿編校布梓時寶祐丁巳也自序曰余蚤
歲雕鏤纂組溺志詞章既而悔之方將鞭僻近裏以

進聖賢之學其敢以詩傳哉又曰前歲歸自京師繼
罹憂患蓋不復言詩也其詩俱丁已以前所作雄渙
老健突兀自放南渡後詩家罕此標格

九疑紫霞洞歌

猗與奇哉紫霞之洞真天開千變萬狀不可述恍疑幻
出壺中之蓬萊湘濱兩妹不敢到悵望蒼梧雲縹緲爾
來三千三百年斑龍空臥金光草我采姪女江華濱是
為三十六帝之外臣右持綠玉杖左攜紫金經長歌天

上謠一呼開仙局列炬照深窈懸身事幽討羣仙喜我
來驚笑欲絕倒何侯撫我頂偉遠拍我肩綠華贈我金
條脫明期分我紅景丹借問此何地指言太虛天翠霞
紫雲張寶幄懸瓊結綠盤瓔珞萬疊蒼苔荒石田誰呼
青龍耕紫煙虎嶽銅牆未遍識擬開寶藏翻雲帙嵯峨
水際披蓑翁應是錢鏐釣神龍仙人何多事驚世
駭俗變靈異或跣距足垂天雲或印短趾流沙潯或現
姑射處子身粉霞紅綬藕絲裙或示普陀大士形或持

簪柳垂寶璫或插鏤象管或結火齊珍或琢元圃玉或
布祇園金洞中之深不知幾百里但見縈紆屈折一里
一澗水人言有路通桂林乘興欲尋日華君吾聞洞中
大小洞天三十六帝遣列真分治局上界官府應更多
定知此洞今誰屬猗與奇哉紫霞之洞真天開我上會
稽探禹穴復浮滄海登天台巖谷豈無奇視此何塵埃
摩挲崖石題惡句記我杖屨敲雲來黃涖翁元漫叟目
力一生空宇宙澹巖陽華有何奇枉費篇章劉石竇

代送徐侍郎赴召

大厦誰堪任棟梁
試畱齋艦問行藏
朝廷議論如春雨
吳蜀人材似夕陽
三漸何曾投砭劑
五寒今望起膏肓
擬看相業磨崖在
卻到浯溪話別觴

送廣州劉叔治倅欽州兼守事

天涯亭畔擁提屏
丹荔蕉黃滿去程
阜蓋卻迎新別駕
碧幢應憶老先生
象蹄印雨歸蠻國
鯨鬣掀潮撼海城
曾是卿賢分守處
試尋醉石共題名

余靖韶州人曾守欽

逢熊季可

暮雲春樹飽相思，今共秋風捋白髭。
北闕未知鸚鵡賦，南州空誦鷓鴣詩。
旗亭尚憶髡能飲，客路誰知朔獨飢。
賴有湘翁生計在，且吟九辨擷江蘺。

寄李伯輝

石嶙峋下寄吟身，靜掩柴樞琢楚珍。
蘋草青莎招隱士，暮雲春樹憶詩人。
門無車馬多嫌僻，家有圖書不似貧。
擬借大鵬揩老眼，何時尊酒得相親。

舜祠送桂林友人

堯山分首舜山逢呼酒旗亭兩鬢蓬
客思且須論契闊詩文應不計窮通
兒曹富貴秋煙外前輩風流落葉中
明日吟船又何處渡江衣冷荻花風

訪伯父幽居

對坐如禪舍閒燒石乳香
書看新講義藥問未傳方
僕語梅花裏僧經竹案旁
題詩吾豈敢窗戶半吟章

梅林懷李景魏

陽華萬疊雲無計得相尋所學皆時好何人知爾心
莎城百粵遠雪嶠一翁吟已是懷人極天寒滌水深

桂林送人之瓊州招捕海寇

訾家洲畔路別爾苦息息說劍令人喜耽吟與我同
旌旗楓鬼雨舟楫鸞颿風想到瓊峯頂題詩更紀功

與李盤翁知縣登七星山弔石道士

豐嶂矗空青耽奇共一尋苔荒碑意古茗苦道情深
有興梯蒼壁無才咏玉簪吟仙何處去我輩復登臨

次韻史主簿雨夜見寄

水長許由溪春寒入竹扉幾人聽夜雨惟我怯單衣樹
罅青燈耿籬根白菌肥明朝有忙事推枕問漁磯

題王堯章佇香亭

滿池蜀錦照深衣盡日憑欄課楚辭要識此花香絕處
露涼風細雨晴時

送董炎震歸攸縣

千菊溪頭話別情君行我住兩伶俜山中有酒招元亮

石上無禾養百齡
狼尾屋低苔漠漠
龍鬚菜長水泠泠
故鄉語燕應堪聽
莫放扁舟過洞庭

贈衡山侯霖

家住衡山茗塢深
軒轅道士是知音
汗尊酒好聊同醉
石鼎詩難莫浪吟
雨外虺隤寒食路
花邊格磔故鄉心
卻懷世上揚雄少
腸斷侯芭何處尋

送駱起謁襄帥廣西憲

知君無地種江離
看了衡山看九疑
客路不堪還話別

侯門何處可題詩
吟青羅帶行離岸
唱白銅鞮過習池
呼酒試澆征馬足
繡臺油幕有相知

題豫章宋德父遊湘詩卷

醉呼仙叟共浮湘
捆載風煙滿錦囊
名似浦雲山雨起
詩連沅芷澧蘭香
好吟秋月招元結
莫賦朝雲惱楚襄
英巨老仙今寂寞
行人還解識珩璜

常寧道中懷許介之

雨過池塘露未乾
人家桑柘帶春寒
野平豎石為神像

稚子搓泥作藥丸柳下兩姝爭餉路花邊一犬吠征鞍
行吟不得東溪聽借硯邨廬自寫看

烏烏歌

莫讀書莫讀書惠施五車今何如請君為我焚卻離騷
賦我亦為君劈碎太極圖竭來相就飲斗酒聽我仰天
呼烏烏深衣大帶講唐虞不如長纓繫單于吮毫搦管
賦子虛不如快鞭躍的盧君不見前年賊兵破巴渝今
年賊兵屠成都風塵瀕洞兮豺虎塞途殺人如麻兮液

血成湖嶺山書院嘶哨馬浣花草堂巢妖狐何人笞中
行何人縛可汗何人丸泥封函谷何人三箭定天山大
冠若箕兮高劔拄頤朝譚回軻兮夕講濂伊綬若若兮
印累累九州博大兮君今何之有金須碎作僕姑有鐵
須鑄作疾藜我當贈君以湛盧青萍之劔君當報我以
太乙白鵲之旗奸殺賊奴取金印何用區區章句為死
諸葛兮能走仲達非孔子兮孰卻萊夷噫歌烏烏兮使
我不怡莫讀書成書癡

寄雪篷姚使君

贈君昆吾湛盧之寶劍青雀黃龍之巨航懸黎垂棘之
美玉都梁篤耨之名香佳人在何處濯足洞庭望
八荒藹車駢駢薜芷綠欲往從之道阻長倚寶劍兮翼
軫膠巨航兮沅湘玉以彰君子潔身之德香以表騷人
流世之芳我所思兮隔秋水天吳翕忽蛟螭翔佳人佳
人蹇誰與愛而不見心盡傷

題許介之譽文堂

端平丙申桂林伯尚書鍾公以遺逸薦東溪先生許侯於朝越明年得旨補初品官衡州戶掾其誥詞於始則有夙有譽處且嫻文辭之褒於終則有其以行義教於鄉里之勉州里人士莫不榮之又明年許侯乃於東溪之濱創堂五間以為講道著書之地仍摘天語譽文二字以張其名敬上賜也堂成山齋先生為之記者詳矣當世之名卿大夫又為之賦咏者衆矣辱徵俚

作不敢以固陋辭敬書二首以記盛事併叙聖天子始終褒勉之意庶得附姓名於不朽云

曾佐元戎洗綠林此翁何止擅詩聲久辭驃騎尋瓢飲
誰引鳴騶聒耦耕厚禮正羅溫處士浮名還汙阮先生
衡茅那識絲綸美尚擬升堂結社盟

姜夔劉過竟何為空向江湖老布衣造化忌名從古有
詩人得位似君稀聖朝自要求參朮吾道何應賤巖薇
晚節黃花須愛護且教湘士挹芳菲

濂溪書院弔曾景建

太極樓頭霽月寒
斷絃綠綺不堪彈
窗前自長濂溪草
澤畔還枯正則蘭
蒼野騷魂惟我弔
烏臺詩案倩誰刊
傷心空有金陵集
畱與江湖灑淚看

許介之以丞相周益公所書古樂府四篇見寄
敬題其後

紙上珊瑚間木難
曾敲黃閣却征鞍
賞音今有王園否
得句堪尋岫嶁刊
鸚鵡夜棲金屋冷
的盧秋戰玉關寒

春風歸鴈那知已寄與淡宮絕塞看

櫟欄吳大帝廟

赤壁濡須事已虛且依櫟欄酌芳壺九原尚擬吞銅雀
千載今惟記赤烏湘浦有人修舊祀荊州無地展雄圖
定知斫案英靈在閑對祠前洗湛盧

蘇瑩中先往新淦過新渝訪之不遇賦詩為寄
玉筍山前水拍空知君何處繫吟篷敢輕奇士題凡鳥
漫有憂心咏阜螽沅芷澧蘭猶可寄江雲渭樹苦難同

門前景物皆詩卷獨倚簷簷嘯晚風

壺中天歌贈侯明文

蓋頭即可居容膝即可安連雲大厦千萬閒何如壺中
宇宙寬壺中何所有筆牀茶竈葫蘆酒壺中何所為目
送飛鴻手揮絲窗前祝融老僧竹壁上九疑狂客詩壺
中主人知為誰啖棗仙伯雪鶴姿左攬元微袂笑移砥
柱弄河水右拍長房肩飽餐麟脯傾玉船蓬萊山在何
處勸君且占壺中住不會上列金馬門也應不識崖州

路探禹穴浮沅湘脚下塵土鬢上霜我到壺中如故鄉
道中逢老儒曰蜀出

丙穴魚應好曾經問釣磯干戈今未定城郭是邪非詩
社尊黃髮侯門薄布衣乾坤豺虎滿見爾一歛歔

時事

時事如頽屋誰堪任棟梁國貧僧牒賤邊病檄書忙有
分憂宗社無方出舉場未應王謝輩揮淚送斜陽

逃戶

租帖名猶在何人納稅錢燒侵無主墓地占沒官田邊
國干戈滿蠻州瘴癘偏不知攜老稚何處就豐年

訪表叔季竹齋

門庭接豆根吟避市塵喧每愛詩無敵應知學有源雲
山供俎豆筆硯長兒孫愧我相過數秋風酒一尊

擬長沙訪姚雪篷至永卻返賦寄

今傍南軒住應知理趣精通書多似易論語不言誠擬
欲聽微論猶能慰別情江湖風浪隔腸斷楚鴻聲

送蕭大山赴新興令

翡翠芙蓉去路荒
許渾詩裏認封疆
昔聞古部傳宗印
今得吟仙綰縣章
魚婢蟹奴供俎豆
馬人龍戶雜耕桑
澹翁應解知心事
試汲寒泉薦瓣香

訪菊花山人沈莊可

網盡珊瑚采盡珠
只餐秋菊養詩臞
永嘉同社聲名在
乾道遺民行輩孤
我恨朱門無食客
君言青史有窮儒
飢寒正用昌吾道
且對鈴岡共撫髭

懷二蕭

未曾相見已相知
楚粵江山棣萼詩
每恨乾坤催我老
卻於湖海識君遲
機雲才藻今無幾
管鮑襟期欲向誰
靡靡亂山嘶瘦馬
碧雲日暮正相思

疎拙

越冠齊瑟事皆非
疎拙惟甘與世違
客路鶯花秋裏看
故山煙雨夢中歸
采薇有備淮南靜
移粟無謀浙右飢
納納乾坤須俊傑
湘翁只合製荷衣

陳東甫酒間舉作歸心只有杜鵑知之句猶未
成篇因爲續之

歸心只有杜鵑知且倚裴亭共撚髭客路秋風吹杜若
故園春雨老辛夷家貧未辦閑居賦世濁空吟感寓詩
邂逅江湖還別去岸花檣燕兩堪悲

登潭州懷雪篷姚使君

賈井裴亭徧短筇紅塵歸騎又怱怱我尋桂樹吟招隱
君對蓮花誦易通今日江山勞別夢他年燈火課新功

瀟溪最念初平老恨聽聯牀話未終

下攝市

吟到湘潭一葉黃賈胡踪跡正悲涼抱琴沽酒異鄉客
打鼓發船何郡郎楚女越商相雜沓淮鹽浙楮自低昂
塵埃市井無人識濯足江頭望八荒

甲午社日客桂林

卮酒豚蹄客裏歡石尤風緊泉衣單東陽病骨如鸚鵡
最怯南州社日寒

桂林歲晚憶鍾尚書

塵滿湘翁薜荔衣
江湖歲晚鬢成絲
桂州楊五今何處
雪片梅花枉費詩

雲峯寺

擬尋岫嶺看蟠螭
且解青鞋濯禹溪
弔古猶疑九枝柏
譚禪且問一莖蘿
虎抵崖附供僧爨
猿摸廊碑認客題
應接溪山無好句
滿林空羨亂蟬嘶

登濂溪太極樓

岑樓跨層崖灌木翳頽沼曠哉宇宙心況茲展遐眺前
哲日以遠川麓被文藻芳甸馥荃蘅江渚雜鳬鳥亭亭
沼中蓮冉冉庭下草叩寂參太極撫化領衆妙俗薄神
理乖力柔聖途杳英英考亭翁反心會天奧萬里粲良
言一誠貫元造勗哉登樓人畢景盡此道深根復深根
篤行以為寶

醉中偶成

醉敲茶臼嘯秋煙苦欠高陽買酒錢擬入亂山餐柏葉

石牀閒對麝香眠

送友人遊昭州呈陳謙之僉判

閬仙去補荔支譜梅谷歸呈飛鷺秋惟有瓜坡共君住
馬蹄何苦又昭州

夏日偶書

螺贏銜蟲入破窗枕書一垛竹方牀家童偶見草頭字
誤認離騷是藥方

秋日行邨路

兒童籬落帶斜陽
豆莢薑芽社肉香
一路稻花誰是主
紅蜻蛉伴綠螳螂

新淦偶成

飛飛綠鳳挂梅梢
猶記來時雪擁袍
今日歸舟新淦路
街頭稚子賣櫻桃

贈吳季詩

燕子樓頭春色深
曾騎驕馬擲黃金
如今世事漫頭雪
破屋孤燈忍凍吟

到衡岳呈弟山長

閒依禹柏繫征驄
猿鳥應猶怪賤踪
正擬開雲訪韓愈
可能避雨識茅容
朱陵洞裏秋呼鶴
紫蓋峯前曉聽鐘
欲踏青霞尋勝趣
倦遊應許借吟筇

許介之館僕於東溪臨發贈別

洗耳泉頭漱晚涼
西風衣袂水花香
酒邊豪氣橫荆楚
燈下清譚雜晉唐
天地每窮真俊傑
山林偏有好文章
試拈簞茹同君舞
後夜聞鷄月滿牀

下第歸後李伯輝李景魏索近詩

吟徧吳頭楚尾春多慙才客問征塵振衣天目尋黃獨
濯足湘江咏白蘋宋五已慚稱進士陳三何用作詩人
錦囊元屬君家有今買漁經理釣綸

題李湛溪詩集後

楚砧岷葛飽清遊金節銀菟照幾州詩句多如姚少監
行程還似杜參謀黃陵夜誦虞妃泣白帝春吟杜宇愁
擬問湛溪何處是夢隨閩海弄漁舟

寄姚雪篷使君

湘鱗六六寄相思
疎柳新蟬想別時
今夜各聽三楚鴈
秋風又老一年詩
梅花且補離騷闕
薏苡應為史筆知
翦竹疑峯新製笛
待衝霜月訪桓伊

送桂帥鍾尚書赴召

老依牙纛撫吟髭
又折梅花話別思
五嶺不遮鸞鳳詔
四方俱誦鱗魴詩
人才晉魏凋零後
國事江淮倥傯時
賴有老臣經濟在
快呼桂醕餞篙師

題鍾尚書北征詩藁

野雉江鷗滿故都
秋風禾黍撚吟鬚
六千里外驅旃旆
五十篇中見版圖
金鉉尚期扶日御
玉衡終令正天衢
書生亦有中原志
那得君王丈二殳

呈廣西張提刑

陸續城邊按部歸
梅花隨處撲征騑
溪山有助吟題徧
獄市無冤訟牒稀
竹屋呼猿眠碎月
莎庭引鶴步斜暉
莫嫌瘴霧侵湘客
滿路風霜冷皂衣

罪言

愁殺瀟濱蟻虱臣
亂山斜照獨含情
人才不似深衣古
國勢如何幣楮輕
石燕未蘇湘國旱
木牛那濟蜀州兵
幸無杜老流離苦
切莫吟詩到北征

送程營道官滿赴闕

高旻振爽籟蒼鴈鳴芳洲
傾城餞茂宰鄉耄羅藻舟
茂宰蘊淵道厥源溯伊流
宇毗振仁策範俗惇聖猷
夷心灼理要政簡吏統周
芳風被儒肆惠澤淪農疇
魯封有

馴雉張庭無訟牛慨茲戒徂兩離裏鬱綢繆贈我茂叔
蓮紉君晏子裘慶霄視鳳躍神囿瞻麟遊世道日以隘
民瘼誰克瘳厲志抗遐棄吹萬溥九州揆手忝皇鑒敷
文免征愁行行重行行夷庚無駐舟

雨夜讀陸放翁集

爐冷重吹火山房夜黯狀溼薪添茭熟苦茗滯芋煎燈
暗瀟江雨詩吟望澤煙老仙何處去搔首弔塵編

送黃天河

天河那可到山頂翠參差邨屋煎黃蠟官爐焙荔支地
蠻遊宦少縣小迓賓遲鼻祖曾吟處荒苔想滿碑

閒居自遣

雨積桑樞長昔邪誰能載酒訪楊家漢廷用少臣今老
魯俗皆冠我獨髭憂國苦無蠲忿草看書喜對決明花
衰頽嬾作江湖夢擬斲三桮養鬢華

次韻熊雲瀑秋夜見寄

叫徹蒼梧望八荒暮雲秋客各淒涼此情未許旁人會

愁絕中庭月一方

呈姚雪篷使君

祝融應自勝崆峒且讀通書辦聖功事可語人甘受謗
詩能名世不嫌窮春邊采藥收湘芷月下調弦送楚鴻
賴有行人碑尚在棠陰依舊戀東風

雪篷見示送趙東崑詩

皇華歌徹酒杯忙澤畔騷翁送范滂琴帶衡雲弦索潤
馬餐湘芷轡絲香山中狸豹隨吟旆部內豺狼入按章

卻笑詩寒吟骨聳愁看酬倡挾風霜

書蕭千岳集

向來楊陸共崢嶸吟到停雲趣轉清古似洞庭張雅樂
嚴如即墨斂殘兵茵陳終不肥方朔茅苴何堪病冉耕
細讀殘編搔白首未應造物忌詩名

滕王閣下賦

越航蜀艇亂相偎風飽千帆帶雨開閣上鳴鸞今已往
江頭飛鷺只堪哀柳汀絮滿河豚賤桃塢花殘石首來

應接溪山吾不暇自憐白髮欠詩才

宿金灘

瀧吏崖翁是賞音江流泯泯對秋吟天蝦撲火檣帆晚
水狗捎魚島嶼深千里庭闌雲滿眼十年湖海鴈驚心
今宵客枕清如許穩讀西山夜氣箴

寄許介之

贏得詩名遍九州酒徒綦伴半公侯離騷甘隱魚鱗屋
樂府多傳鸛鵲樓醉葉幾窠藏菊徑蠹荷三畝護漁舟

中原應有樓蘭國空鎖吳鉤到白頭

寄戴石屏

曾到元郎吟處吟雪篷煙艇久相尋鳳鳴道國空詩句
鴈到衡峯只信音拾橡祠邊朝聽雨采蘭院裏夜分衾
蹇驢儻遂黃衣約鴉觜敲煙共掘茯苓

寄蕭大山兄弟

梅花好處共心期曾擷天葩寄夢思兄弟自為千古計
江湖方誦二蕭詩貪泉定喜逢廉吏倭國何須拜老師

蕭穎
士事 賸擬尋君攀桂樹路遙誰肯做驢騎

送丁少卿自桂帥移鎮西蜀

瓊海收兵玉帳閒又移齋艦泝浯灣三邊形勢全憑蜀
四路封疆半是山魏將舊聞侵劔閣漢兵今欲卷函關
時會有二
京之役 細傾瑞露論西事想在元戎指畫閒

送絅齋李監丞赴湖南提舉

吏統久已紊使選非易為蝸虺何蓁蓁鴻鴈何累累持
節豈不多曠職苟所私緬懷紫陽翁昔使東浙濬陳臬

糾官邪揚仁蘇民疲茲道有後先哲儒昭令規
綱齋寄
瀟牧邦懋灼帝知勵廉肅察察反稅驩鄉耆所學蘊淵
道寬嚴權理宜茲總全楚境歌此皇華詩位穹民言邈
壤廣吏蠹滋問俗職所重簡僚乃政基視聽貴遠周細
微在可遺攬轡戒前路豈為好爵縻揆予忝英盼懷德
念別離別離果何念康濟乃所期懿茲遠大業肇此咨
度時勛哉振英采慰我湘民思

秋夜感懷

溽露霑灌莽華月流高旻吟嘯嘉此夜撫化悲蕭辰蕭
辰何所悲遊子多苦辛道峻壯力謝業遙昌志湮元鬢
日以變豐景將遂淪堪興一大宅義娥為旅人卉木互
榮落蜚蟀何吟呻氣隨稚耄變理勝恤喜均反性樂天
爵測化葆道真撫卷慨往哲芳猷邈難親

術士醴陵丁夢榮將之春陵有贈

綠水池邊舊釣磯何時歸去濯征衣千年城郭應無恙
祇怕風塵老令威

萍鄉和王堯章韻

征衲無人補舊綿
蕭條客枕楚萍邊
撥殘石炭西窗冷
卻憶山家楮枰煙

雉山寺宋永初中僧西顒誦法華經於此白雉
聽之而化至唐黃梅五祖弟子喜登告祖乞巡
禮五祖應以遇雉即止後至此開山本朝王初
寮有畱題

蘇碑蘿石擁嵒肩
獨倚筇枝問大乘
白雉苦無千歲種

青山空識六朝僧詩傳北岳刊新帖禪接西淮冷舊燈
擬鑿冰泓澆凍硯禊亭閑借法華謄

袁家碣泊舟

往事誰能問水濱停橈仍是薄西曠樵漁空自存袁姓
鳬鴈何應識柳文釣艇分燈歸客艇嶺雲拖雨接溪雲
梗櫓蘭芷今何在空使行人誤舊聞

寄吳茂遠

蘇公隄畔繫吟驢知在垂楊第幾株學校文章如畫餅

朝廷官爵似呼盧春吟應欠梅花在時事曾言楮幣無
惆悵湘潛分袂處今看細雨長蘼蕪

送邵瓜坡試湖南漕舉

槐花匝路促湘行閩賦唐詩舊擅聲有志向曾言國事
論心何止在科名畢方夜燭杭都火大角秋纏蜀道兵
莫笑腐儒場屋話琅玕滿腹正須呈

送李公裕遊臨武

嶺梅籬菊兩關情歲晚江湖載酒行客路欲依嚴挺子

瘴鄉已老少游兄瓦盆且話田家事肉食誰通鈍漢名
惆悵韓張亭畔路雪鞭風帽又東征

江華送熊清父遊廣州時予有衡陽之役

邂逅陽華且酒壺海鵬衡鴈各征途閑身俱被飢寒役
老境還堪離別無鄉夢定應思款段客吟何用說娵隅
曾從仙叟參元訣好訪安期采澗蒲

喜李景魏就熊巖伯縣尉招

長歌白石草廬深今抱園絲就賞音溫飽不為兒輩計

行藏端見古人心
鱸魚堂上春開帳
灘鰲灘前夜對衾
擬挂奚囊梅下聽
謫仙應共隱仙吟

送友人之辰州覲省

跼鵲巢畔瘴雲低
山徑如梯去馬遲
正則自吟皇樹頌
廣微惟誦白華詩
春風采藥桃花國
落日尋碑薏苡祠
覓得丹砂能寄否
溪亭送客鬢毛衰

南林寺

律院僧應俗庭荒
草木剛無碑堪考
古有客自看山竹

好惟嫌密雲多不自閒小溪知最近童浴夜方還

癖齋小集

杜旃字仲高金華人仁翁汝霖之孫陵之子兄伯高
旃弟叔高旃季高旌幼高旻皆有詩聲時稱金華五
高戴復古贈旃詩有兄弟皆名士文章動上台之句
旃與陸放翁楊長孺往來酬倡詩法老杜古詩尤能
得其渾灝委折之妙嘗讀杜有云相望五百載如接
顏色溫又云爐冶無停工況復忝諸孫旃亦其後邪

著有杜詩發微傳於世

白雲在南山

白雲在南山幽鳥乘風飛鳥飛不能遠雲高還難依園
中亦有菊堂後那無護遊子不得歸銜悲欲何言

綠珠行

蜀絲殷空金作谷珊瑚成林珠百斛彼姝千花萬花簇
明月出胎照波綠鏡中飛鸞掌中身夜月春風看不足
悲歡倚伏機禍福西里憐顰東市戮願將舊意奉新人

此別他生定難卜君因妾死莫多怨妾死君前君眼見
高樓直下如海深壁玉一碎沙中沈平時感君愛妾貌
今日令君知妾心

明鏡行

明鏡照形不照影明月照影不照心朱絲委地流水咽
寶劍挂壁蛟龍吟二桃畫謀恩義絕慘慘嚴霜飛六月
銜石海可填鍊石天可補君非食蓮葯安知此心苦

上徐子宜侍郎二絕

當年金屋誤承恩
自倚容華托至尊
風外遊絲難繫日
依肱青草暗長門

猿臂將軍戰不休
當時部曲亦封侯
夜涼忽夢燕山月
猶幸君恩晚見收

九日懷陳舍人

白髮江湖暗青燈
几席涼窮途幾半
百佳節又重陽
命也吾奈何天乎
孰可量元龍樓百
尺猶足慰行藏

蔗境庵二絕

世事多端好備嘗未能悅口勿輕忘結交莫厭初年澹
晚節相看味始長

美惡初終自不同新人那念舊人容君知食蔗逢佳境
不念人閒有菲葑

別江陰宰魏元長兼望木叔使君

荆山抱璞自遭毀漠漠塵沙埋皓齒咸韶正音或出囊
下桐千年憤鐵一日變化成蛟龍人生相歡貴知己心
不相知異生死豈不見豫讓不報中行氏又不見聶政

殺身酬仲子

滄海終可填太行竟能移丈夫殺身為感激有恩不報
非男兒意氣磨日月感遇由一時齊威九合諸侯盟黃
河倒流五岳傾楚茅入貢民冠帶金繩玉檢思告成高
臺已荒曲池旣平不見夷吾功但聞鮑叔名

山有狙行

山有狙不可馴山有虎不可親狙詐匪懷德虎飢須噬
人死生托良馬信厚稱瑞麟野性定難保猛獸終不仁

王粲宅

春風佳人命多薄深宮井冷梧桐落江邊百尺斷魂樓
未比鷓鴣一枝託漢家待士禮意失黨獄淪胥生鼎鑊
南山豆萁苦燒焚鸚鵡洲邊埋一鷄丈夫擇木豈無術
何爾依劉燕巢幕君不見平時子房侍帷幄一語不投
斃文若登樓此日誠可哀亦恐從軍未為樂

書懷呈鍾君祿吏部

君不見黃河之水能上天白髮一變無由元人生住世

無百年倏忽變化空中煙眼前富貴皆年少悲苦長多
少歡笑抽弦促柱向君彈宛轉淒涼不成調

持心託明月明月照影不照心彈劍發長歌歌長宛轉
多苦音瀉水東西南北流昔日年少今白頭欲對君前
歌此曲恐君淚下不能收

勿除蔓行

蔓草君勿除葉蒂相連牽春風共滋長秋露同裛殘庭
前梅花樹一種同根生南枝暖北枝寒

紙被一首

疎布裏敗綿破碎錯經緯嚴風過强弩終夜縮如蝟刺
溪褚夫子益友吾所畏策勲在覆冒周密罕儔彙隱狀
萬里城可卻戎馬氣脈髓盎春溫濁酒有醲味直躬免
蹉跎夜氣益洪毅吳宮鳳花錦伐命可獻敝物微用匪
薄道在窮不諱緼袍可終身狐貉不足貴

陸務觀赴召

四海文章陸放翁百年漁釣兩龜蒙數開天地吾何與

老作春秋道未窮
李耳守官逾二代
張蒼職史到三公
坐令嘉泰逢周漢
此是君王第一功

同平父園中即事

季冬少寒凜霜薄
日色明訪我會心友
相攜園中行菜甲
長疎花梅枝綴初英
潛魚戲清波寒雀煖
有聲小步極遐覽
閑吟暢幽情語言接
繾綣意適體自輕
歲華晚更好景趣靜
始并俯仰物態閑
聊與同春榮

賦賢已錄

靜觀趙史君喜棻
有是錄約子賦詩


物理因人創神機自古傳揚雄嗟有法孔子歎猶賢勝
負存虛實初終謹後先按圖嚴畫井起數象周天百戰
期爭道三隅察守邊開基思漢祖復土想周宣審勢攻
無備沈幾救未朕勝心游碧落幽思及黃泉冒利魚貪
餌乘虛鴈落弦紛爭忘父子迷惑到神仙守必防重析
攻須出萬全妄興侵伐意私擅殺生權給弄心懷詐包
藏智益元甘辭韜甲冑險志匿山川諱忘真情露誇
小數專怯圍潛卻步貪得暗垂涎見逼難思進相持莫

敢前蹈危鬚捋虎役志耳鳴蟬意滿渾忘食神馳更廢
眠弱形遭毒手短節不空拳悔誤徒批頰矜高欲比肩
禍胎還隱伏陣勢漫綿延詭道非存正羸師合忘堅設
心踰虺蜴攫子甚烏鳶造妙羣心妒趨亡衆目憐淺謀
徒躁進重地莫輕捐黑白材因見雌黃論豈偏高人真
託興遠見始忘筌鑒戒無忘此防虞蓋有焉請看奕碁
句何愧鬪雞篇

讀杜詩斐然有作

王澤久淪洽正聲皆雅言百川忽西流青黃雜犧尊騷
經吹死灰明燭日月昏綺麗兆建安淳古還開元夫子
握元氣大音發胚渾明婁失毫芒神義隘乾坤再變六
義彰一日五典墳上該周南風下返湘水魂仲尼不容
刪餘子何足吞五季兵戈繁嘲哂蟲鳥喧頽波既瀾漫
新奇尚西崑叻喙生譏評神鬼懷憤冤王蘇發醢甕黃
陳窮河源煌煌百年間後學同推尊時時或嘗鼎往往
猶戴盆倣摹惑銅盤箋釋譌金根顧余小子旃獨受罔

極恩神融淚交墮思苦心屢捫相望五百載如接顏色
溫爐冶無停工況復忝諸孫斯文誠儻存庶以起九原



宋百家詩存卷三十六